

閩侯縣志卷二十六

物產四

花類

蘭 花心紅萼紫者名草蘭不避霜日火燒其根植之則花白又有花心紅而花多於草蘭者名馬耳香遜素心馬耳一箭十八花者名十八學士福州北門馬鞍鄉民植市之凡此皆蕙屬也福州有報歲蘭冬末春初開花故名其葉光潤視常蘭倍闊花墨紫色茁者一萼三十三朵風蘭 一名挂蘭又名髮蘭亦名吊蘭不土而生懸挂簷前無日照處性喜風故名風蘭墜之以髮故名髮蘭挂在水上即得水氣升蒸亦時取下水中浸潤之

樹蘭 木蘭 閩廣多樹蘭花與珍珠蘭同但彼草本此木本耳有謂即古之木蘭者木蘭即今之玉蘭樹蘭亦名木蘭

玉蘭 一幹一花三月盛開花落即從蒂旁抽葉從葉中結小蕾計結蕾閩侯縣志 二六 物產四 一

至開花九閱月分種者用木筆接針樹愈大則作花愈小

賽蘭 珍珠蘭 一名翠蘭俗名魚子蘭又名雞爪蘭夏秋間開佛經謂

伊蘭即此花也又名珍珠蘭

鶴蘭 係黃紅二色

牡丹 德化產牡丹福州牡丹以鼓山湧泉寺西門外浙江會館為美近

福州北門方家栽亦得法

芍藥 郡亦有植者然不甚盛

秋海棠 有紅葉者其葉紅絲裊裊無紅絲者為白葉著花則一也移植

宜北牆根溼土之地其卵如雞子

葵 有數種蜀葵出戎蜀葵花白者主痰瘧黃者尖狹夏開花淺黃色主瘡癰小花者名錦葵紅者謂之一丈紅葵皆百葉獨一種單葉紫色者名葵团又秋葵俗呼金花捷報其花浸油解湯火又向日葵黃色大者如盤徑六七寸花恆面東故名

百合 莖高三尺許葉如柳四面攢枝而上四五月開白花長莖下覆花心有檀色根入藥亦可蒸食或以爲粉子生枝葉閒不附花此又異也
又一種莖葉俱小花深紅色俗呼鶴頂紅

萱草 萱草一名宜男一名忘憂花淡紅色

滿山紅 卽萱草之開紅花者萱草有黃白紅紫麝香重葉單葉數種福州呼黃者爲宜男草呼紅者爲滿山紅

百子蓮 種出西番每莖數十蕊色藍

曇花 葉叢生如帶著花高二三尺許花色純紫一枝數十蕊長二三寸

花六出

金鳳 狀如飛鳳有紅白粉紅數種一名鳳仙

蓮 紅白二種有千葉者俱有實

白午時蓮 向午開浮水面傍晚花合沉入水中故名

美人蕉 無蕉實花可供玩三四月閒齊放簇若朱蓮經月不敗

閩侯縣志 二六 物產四

二

月下香 葉叢生細而長中吐一莖可數十蕊花白開自下而上至晚愈

香故名一名晚香玉

胭脂花 有紅黃白及五色四種卽晚香花俗呼胭脂花

玉簪 形如玉簪亦名白鶴又有一種似玉簪而小色淺紫名紫簪

雞冠 秋生紫色如繡畫雞冠之狀福州有純黃純白純紅有黃紅各半

者有各色參錯者有矗起如麥穗者高至七八尺極矮者呼矮髻

鳳尾 有二種大者花白蕊黃穗生長僅尺若鳳尾然一種差小亦名七

里香

菊 其品不一各府皆產

漢宮秋 凡漢宮秋之類須收子貯囊中雨水節以鬆土種之全紅者名

雁來紅紅雜黃者名漢宮秋白雜黃者名老少年

蓼 卽水葳花細莖弱葉有紅白二種

剪春羅 花淡紅色旁如剪刻秋開者名剪秋羅

金絲蝴蝶 花黃色形如蝶

雪瓣 似茉莉而瓣大其香清絕其樹叢生高不及丈枝條軟弱葉對生而圓

梅 有紅白二色紅者多百葉水紅梅着花時畧帶新葉彷彿紅杏燈影梅極盛然少重臺白品梅不及南京紅品梅勝南京綠萼天寒亦着透花若南風則拳曲矣

素心蠟梅 色如黃蠟而帶蜜味香似春蘭開時葉盡落磬口馬耳心有紅點皆不足貴

珠梅

海棠 有鍊幹西府垂絲木瓜數種

桃花 碧桃緋桃花俱千葉淡紅者爲美人絳

矮桃 福州矮桃高尺許結實如杯可入盆景

夾竹桃 一作半年紅其種來自西域木高丈餘葉長而狹花紅色自春

閩侯縣志 二六 物產四

三

徂夏相繼開不絕一作俱那異

李花

梨花

杏 花小而色淡不結實

山茶 花深紅色冬盛開蜀茶亦名滇茶以錫丹寶珠東方亮六角紅六角白爲上品東方亮色如黎明尤美

山礬 木高數尺花春開極香

越橘 樹如黃楊花白實如朱櫻

木筆 一名辛夷其花初發如筆因名

槿 葉類桑花如牡丹而尤紅亦名朱槿

棠棣 條生花淡金色

繡毬 色白花一簇數十葉其圓如毬又名雪毬

紫荊 木似林檎花深紫可愛

紫薇 俗謂之不奈癢花爪其本則枝葉俱動五月開花至九月尚爛熳
又謂之百日紅

梔子 一作支子花六出實七稜可入藥

桂 葉似枇杷而有鋸齒生巖嶺間冬夏常青又作巖桂木紋如犀可以
為器亦號木犀有丹黃白三色四時開者曰月桂白者呼銀桂黃者呼
金桂木犀其葉似桂無鋸齒

末麗 夏開白色而香方言謂之末利又有紅末麗藤生亦香花皆夜開
有單瓣者有重瓣者

斜題 一作闍提葉如梔子花白色朵朵欹側如筆故曰斜題

含笑 白花有二種小者香尤酷烈或呼之為杏

杜鵑 一名躑躅一名山石榴一名映山紅有深紅淺紅及紫者

指甲花 其葉搗和鹽以染指甲甚紅過於鳳仙

拒霜 一名木芙蓉秋開色淡紅一種百葉朝開純白午後則漸紅如醉
閩侯縣志 二六 物產四 四
謂之醉芙蓉有單瓣者有重瓣者

山丹 一帶百餘莖如繡毬狀深紅色一花四莢閩中呼紅山丹為花虎
不宜諸花雜植

白山丹 枝葉花俱與紅山丹同

馬纓花 以形似得名

玉瓶花 花細香烈

頽桐 葉似桐高五六尺繁花鮮紅如火一名朱桐

酴醾 似玫瑰而多刺酴醾味香甜似酒勝於玫瑰故字從酉花單瓣不
重臺大過玫瑰刺長而細色紅紫非淡紅尤非白色

薔薇 朶極小皆白無紅者三山志各書皆誤以薔薇為酴醾以酴醾為
薔薇故紅白倒置也

紫玫瑰

迎春 俗呼金腰帶叢生花黃色

黃雀兒 一名迎春

麗春 花似長春而差大三月開

長春 枝幹有刺花紅四時常開

寶相 藤生葉類長春花類醅醲

月季 長蔓硬刺

凌霄 藤蔓附大木而生其花黃赤夏盛一名兔絲子

木香 莖葉俱似薔薇而花差小

金銀花 一作忍冬花花黃白相間凌冬不凋

素馨 蔓生白色

風車蓮 籐生花青碧色

夜來香 蔓生一簇數蕊香甚清逸夏月盛開花淡綠

罌粟 花有紅白二種九月布子春深乃生實如小罌子如細粟

千日紅 色紅無香極耐久浸以熱水色更新妍

閩侯縣志

二六 物產四

五

鷹爪 藤生夏開末銳似鷹爪花淡黃色

棟花 樹有雌雄雄者根赤無子雌者根白有子

虞美人 花輕薄似罌粟枝葉柔弱

竹類

竹 福州以竹為器其裝船出洋則貓竹為多篔竹次之

麻竹 大至徑七八寸葉亦大筍夏生一作貓竹土人或取其葉以裹角

黍冬筍不出土味最佳春筍乃能成幹春半出土者其筍曰半含冬清

明穀雨重至六七斤名貓筍越小滿成竹矣

苦竹 筍味甚苦烏龍江產苦竹者以名其鄉

還味竹 生福州以南

苦油竹 福州及下游皆產

鳳尾竹 梢葉森秀如鳳尾然

石竹 福州及西四郡皆產之

雷峯竹 節短而整交節處特殺以其形似西湖雷峯塔故名
甜竹 其筍卽甜筍大如管如笛一宿卽黝

淡竹

筍絲竹 榦麤葉大其筍六月生肥茁重者八九斤名六月麻以藥刀切

片和鹽水泡之水酸卽成筍絲出侯官溪源宮孤民樓者佳

觀音竹 榦細而葉小土人多盆植爲玩

赤竹 產福州

紫竹 山邑皆有之

柴杆竹 取竹漚竹茹者用之

方竹 侯官壽山產之

桃枝竹 桃枝竹乃櫻竹閩園林處處有之榦紫色

金絲竹 榦中有三道黃色產福州

錦邊竹 產侯官北嶺其筍每籜皆有朱紅線

閩侯縣志

二六 物產四

六

蟲竹 叢生如筍每節生蟲如新蟬之未翼者無竅隙隨竹而長竹將枯
乃穴其旁而出

人面竹 其節一俯一仰如人面產侯官之烏石山各屬亦有產者

倒挂竹 竹枝葉皆倒生產福州

錦竹 一名石竹叢生高尺許俗呼天竹又名天南竹產福州

天竹 葉如竹其實臘月紅如珠

拇筍 野生產福州煎爲南蕈

藤類

紫金藤 生福州山中

王孫藤 產福州

黃藤 可纏束屋柱又名水藤

千金藤 主一切血毒福興皆產

草類

芙蓉 卉屬高尺許葉似側柏而淺碧味香村婦以飾髻

芭蕉 不落葉一葉舒則一葉焦故謂之蕉

茅 白花

苾 似茅可以為繩索履屨亦可為筥閩書作芒

菅 似茅而光澤無毛

葛 蔓生山谷搗以織布又一種葉似葡萄根如長臂搗為葛粉其色粉

紅

蕒 江生者為淡蕒近海者為鹹蕒即鹹草

苜蓿 藤生花不結實其實別生於莖葉閒形如勃薺皮黑色有圓點而

微凹頭痛切片貼太陽穴

蘋 葉圓濶寸許季春始生

浮萍 有大小二種亦謂之瓢

藻 生水底莖如釵股如蓬蒿

閩侯縣志

二六 物產四

七

海藻 有二種皆可食

蘆 或謂之葭小者曰荏

海蘆 隨在有之長丈許

蒲菁 生水邊其葉離披兩旁如鋸齒

蒲 生陂湖中嫩者可食漢嘗以裹輪

石菖蒲 生石磧上葉脊如劍

蓼

燈草 生澤地叢生莖圓細而長

菠 葉似野艾而幹矮清明取其汁作粿名菠菠粿

艾 有大葉者有小葉者

旱蓮 植於盆石

薺薺菜 即薺菜三月三日福州探懸於門

三七草 其根治吐血衄血刀斧傷

水燭 產海墘花如蠟燭肉如絮能止血鎗刀傷用

仙人掌 年久有高至一二丈者形如熊掌有刺無指掌中生掌接於頂而高

雞母刺 幹高二三尺紅色其葉多刺火傷者搗其根傅之

簪下珠 其葉對生葉下結子如珠治小兒疳病

薯榔 色黑肉紅可染產福州及下游

書帶草

龍舌草 形如龍舌而肥莖兩旁有刺婦女以葉津黏鬢

白薺草 可製麴釀酒

乳草 枝紅葉細食之能通乳竅

螺髻草 亦名鏡面草蔓生石上狀如螺髻背有少毛

螺疔草 又名梅花草以其葉五出畧似梅花也平鋪地上極蒼翠可愛

鳳尾草 形極似鳳尾

閩侯縣志 二六 物產四

八

狗尾草 葉似蘭草纖柔可愛花極似狗尾可憎

蝦蟆草 葉如小瓢高一二寸小兒腹痛以葉縛當臍常愈

虎耳 好生溼地治疔耳搗汁滴之

赤酸施 生福州泉人謂鹹酸草

鯉魚橄欖 緣樹生形如橄欖而差扁剖之中有鯉魚鱗甲俱備產福州

郡治烏石山之虎符潭及尼帽石下

醉西施草 卽含羞草葉柔弱以指捫之或以氣噓之卽低垂而合

建水 卽石草生福州

燈籠草 以其子似燈籠故名

占風草 福州呼風颭草

火欵 葉似紫蘇州人呼其葉為火欵草卽茺蔚

犁頭草 葉似犁頭

梭葛 一作斷腸草一枝三葉食之輒死蔓生葉似夜來香誤服者灌以

生羊血嘔盡則生不得羊血先入薤菜汁或鴨血或綠豆漿
七步緊草 七步緊形如壁虎被傷者急以此草敷之

木類

榕 一作楠云州以南為多至劍建則無之以其臃腫不中繩墨名以楠
或曰其蔭覆寬廣宜以榕名有二種一種矮而盤桓其鬚著地復生為
樹一名赤榕上聳高大此樹生至福州而止故福州號為榕城

水榕 葉長於榕近水尤茂

簌湯糲 樹葉如水榕但子大而色微紅俗以色似糲糲故名

杉 類松而勁直葉附枝生若刺針然作宮室以此木為上福州興化龍
巖產者不及延建延建不及汀州

樟 高大葉似栴葉而尖長彌辛烈者佳為大舟多用之

桐 有四種青桐皮葉俱青而無子梧桐皮白葉青而有子白桐有花與
子一名椅桐又名崗桐崗桐似白桐惟無子可為琴瑟今閩產者大槩

閩侯縣志

二六 物產四

九

有二一種葉有三枚結子如胡椒可食者曰梧桐一種葉圓而未尖二
月開淡紅花子可壓油者曰油桐其皮煎為桐蔞

松 其節為松明其脂為白膠閩以松入爨稱為火柴
水松 葉似檜而細長按田家植以衛隄以分界其幹上聳如孤樹葉則
瑣細秀茂根沒水中不朽

羅漢松 葉如雀舌其樹難大

杜松 葉似杉而小尖勁如刺木似松而有文一作杜樅

栢 葉扁又有葉側向而生為側栢

檜 栢葉而松身

刺檜 矮短多橫枝

槐 閩中有白槐黃槐二種

桑 與柘為二種皆可以蠶

楓 福州呼榻橫鋸為砧板

烏柏 葉似梨花黃白子黑色土人多取其葉以染皂子可壓油卽柏油也

柳 柯條與北土無異

水楊 葉圓而闊枝條短硬多生水岸

檉 葉細而枝柔

黃楊 葉細皮薄歲長三寸至閏年則縮一寸福州以黃楊為杞

椿 葉似橄欖芽可噉

樗 香者名椿臭者名樗

榆 各屬多產視為無用

梓

櫛 福州及西四郡皆產

楮 實如楊梅

文點樹 葉似廟社之文點

閩侯縣志

二六 物產四

十

藥 木枝葉與榴無辨皮黃子赤枝可剉以染黃

椒 西戎名胡椒本土者名土椒俗呼花椒福城定光塔頂一株

冬青 其葉常青

橡 八九月結實名皂角其殼可以染皂

皂莢 又一種曰肥皂亦可洗衣

蒲葵 葉似櫻可為扇

椶櫚 亦曰椶櫚年剝椶片兩次其木可作簞槓

枕椰 木似椶櫚有節葉亦如之

鳳尾蕉 相傳植之庭中可避火卽鐵模其樹難大

練 三四月開花實如彈丸熟則黃卽金鈴子也

雞籌 或呼瓜子松

加條 俗名菠葉